

Communicaziun da medias digl cumegn da Surses (nr. 17-2021)

Surses: preventiv 2022 cun grond surple d'antradas

La radunanza communal ha approvo igl preventiv 2022 tgi prevei en surple d'antradas da radond 2.3 milliuns francs. Las investiziuns bruttas montan a 12.87 milliuns francs. Ultra da chegl è igl suveran er concedia credits per divers projects d'investiziun. Igl pe da taglia resta sen 100% dalla taglia simpla digl cantun Grischun.

Tar antradas da 36.1 miu. francs ed expensas da 33.8 miu. francs prevei igl preventiv en surple d'antradas da 2.3 miu. francs. Chel bung resultat sa resulta d'ena indemnisaziun da scadenza unica da radond 2.6 miu. francs tgi l'Ovra electrica digl martgea da Turitg (ewz) paia per l'ovra electrica Casti vest. Ultra da chegl vign chinto cun duple antradas tar la taglia da midada mang e la taglia sen igl gudogn tras la vendita da bagn immobigliars.

Las investiziuns bruttas montan a 12.87 miu francs (investiziuns nettas 10.35 miu. francs) e pertotgan cunzont l'infrastructura communal, vot deir la sanaziun digl provedimaint d'ava e la sanaziun da veias communalas. Er ainten l'infrastructura turistica duess neir investo. Uscheia cuntigna igl preventiv tranter oter l'investiziun per realisar ena implant da sport cumbino da piazzas da tennis ed en glatsch artificial incl. en bietg da menaschi per ena somma da total radond 3.7 miu. francs (realisaziun an 2 etappas).

Nigna midada tar igl pe da taglia communal

An vista allas investiziuns considerablas tgi spetgan igls proxims onns sen igl cumegn è la suprastanza proponia da mantignair igl pe da taglia communal per la taglia d'antrada e per la taglia da facultad sen 100% dalla taglia cantunala simpla. Chella proposta è igl suveran approvo, malgro ena proposta or dalla radunanza communal da sbassar igl pe da taglia communal sen 90%.

Concessiun da divers credits per projects d'investiziun

Alla basa digl preventiv 2022 è la suprastanza dumando d'approvar igls credits per divers projects d'investiziun. Uscheia è la radunanza communal concedia credits da total 2.9 miu. francs per igls suandonts projects: sanaziun digl reservuar Balandegn a Salouf; sanaziun dalla veia naziunala e construcziun d'en passape a Rona; sanaziun dalla veia cantunala tras la vischnanca da Parsonz; sanaziun dalla Veia da Del a Salouf; e la renovaziun digl Punt Mulegn a Parsonz.

Sustign per la Scola per sports da neiv da Savognin

La Scola per sports da neiv da Savognin prevei da renovar ed amplifitgier igl neivadoir tar igl paradis da skis per unfants a La Nars, Savognin. Igl project prevei investiziuns da 0.95 miu. francs. La radunanza communal ha decidia da sustignair chel project cun en import unic à fonds perdu da 0.24 miu. francs per la producziun da neiv tecnica per la loipa da cursa lunga a La Nars tgi la scola per sports d'anviern fò per incumbensa digl cumegn. Ultra da chegl è nia concedia ena contribuziun da sustign unica à fonds perdu da 0.16 miu. francs ed en amprest sainza tschains da max. 0.3 miu. francs.

Ulteriouras decisiuns

Sainza discussiun è la radunanza communal decidia da fixar nignas restricziuns pertutgont las quotas per la vendita d'immobigliars ad esters pigl 2022, conform alla practica actuala.

Pinavant ò la radunaza accepto la dumonda d'en interessent per la compra dalla parcella da biagier nr. 5668 digl cumegn a Badogna, Cunter, per biagier ena tgesa d'abitar. Chel taragn sa catta ainten ena zona per promover la construcziun d'abitaziuns per persungas tgi peglian domicil a Cunter.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 8 da december 2021